



Gutpela Wasman

No 2/2018

**Jisas Krai i tok,
“Mi gutpela wasman
bilong sipsip.”**

Jon 10.11

Wanpela King i laik helpim yumi

Stori bilong king i laik lukim God

Long wanpela longwe kantri wanpela strongpela King i bin stap. Long laik bilong em, em i bin lukim planti samting na mekim planti wok. Wanpela samting tasol em i no lukim yet. Em gat strongpela laik long lukim God. Olsem na em i askim olgeta saveman na pris long larim em i lukim God. Tasol i no wanpela bilong ol inap long soim God long King.

Bihain wanpela wasman bilong sipsip i kam na go lukim King.

Em i tokim King long lukluk long san. King i traime, tasol lait bilong san i strong na ai bilong King i pen. Em i no inap lukluk moa long san. Nau wasman i tokim King olsem, “King tingim, yu no

inap long lukim san. God i bin wokim na em i kriesen bilong God. Olsem wanem yu laik lukim God? King i amamas long gutpela ansa bilong wasman na askim em narapela kwesten gen, “God i bin mekim wanem wok?”

Wasman bilong sipsip i tokim King, “Bipo mi inap givim ansa long yu, mi laik yumi senisim klos bilong yumi.” King i orait na em kisim ol naispela klos bilong em na givim long wasman i ken werim. Nau king i kisim bikpela rabis kolsiot bilong wasman na hangamapim bek bilong wasman long sol bilong em yet. Nau King i luk olsem wasman na wasman i kamap olsem King. “Lukim, King”, wasman i tok. “Dispela em i wok God i mekim. God i lusim sia king na kamap olsem yumi man. Em givim yumi wanem em gat na kisim wanem yumi gat. God i mekim dispela wok taim em i givim Jisas long dai long sin bilong yumi.”

Renate Wolf, taken from “Auf der Spur.”



Jay Kay i helpim wanpela rabis gel

Mama i bin karim em long wanpela liklik ples ol i kolim Salem. Na tupela papamama i save lukautim gut tru dispela boi Jay Kay. Taim em i winim 5-pela krismas pinis, tupela papamama i putim em long skul na em i save harim tok bilong tisa na i save bihainim gut tru. Em i stap olsem wanpela pikinini i gat gutpela tingting insait long klas. Taim tisa i askim wanpela kwesten, em i save putim han i go pas na givim ansa. Na em i save skul gut tru i go inap em i wokim gret 10. Ol i mekim tes na Jay Kay i kisim gutpela mak tru na i winim ol arapela sumatin insait long klas. Na Gavman i baim skul fi bilong em na salim em i go long wanpela kantri long Afrika. Em i mekim



gret 11 na 12 long wanpela liklik ples ol i kolim Lili na bihain em i go long Yunivesiti.

Taim em i pinisim Yunivesiti, em i holim wanpela bikpela posisen insait long Gavman na em i wok. Long taim em i stap long skul, em i harim stori olsem, wanpela famili i stap tarangu stret na i werim ol bruk bruk klos na ol i nogat gutpela haus bilong ol. Ol i gat wanpela liklik haus em i bagarap pinis na ren i save pundaun insait long haus. Na i nogat ples bilong slip, ol i save slip arere long ples paia. Tasol Jay Kay i harim dispela stori na bel bilong em i bruk olgeta na em i tokim tupela papamama bilong em olsem, "Mi bai kam wiken long haus." Na tupela papamama i amamas tru na redim bikpela kaikai, na bihain tupela i go wetim em long ples balus.

Jay Kay i kisim balus na kam kamap long ples balus na ol famili i welkamim em na ol i amamas na ol i kalap long ka na go long haus. Tupela papamama i redim bikpela kaikai na ol i sindaun na kaikai i stap. Nau Jay Kay i tokim papamama olsem em i laik maritim wanpela gel bilong wanpela tarangu famili tasol tupela papamama i tok, "Mipela redim pinis wanpela pikinini gel bilong bisnis man na mitupela i laik kisim dispela gel tasol. Sapos yu kisim dispela kaskas gel orait yu kisim dispela gel na no ken kam long haus bilong mitupela. Nogat tru."

Jay Kay i tok em i orait. Apinun liklik em i wokabaut i go long haus bilong ol tarangu lain, na em i go noknok long dua bilong haus, na lapun papa i kam opim dua na em i lukim boi Jay Kay i sanap i stap long dua na i tok, "Mi laik maritim

pikinini gel bilong yupela na mi kam." Tupela i harim dispela tok na bekim, "Yu gat bikpela save bai yu no inap maritim pikinini gel bilong mitupela, nogat." Tasol boi Jay Kay i tok bai em maritim dispela gel tasol. Sapos nogat bai em no inap go bek. Tupela papamama i nogat tok bilong tupela na tupela i lukluk long gel. Na gel i tok, "Em orait, mi nogat tok." Jay Kay i amamas tru na tupela i kalap long balus na go long ples wok bilong em.

Namba wan de Jay Kay i baim ol spesol marasin i kam na tokim kaskas gel olsem, "Mi bai go wok, taim yu stap long haus, go waswas gut tru na dring marasin na rabim wel." Na Jay Kay i lusim em na go long wok ples na dispela gel i save mekim olsem wanem Jay Kay i tokim em long mekim. Sampela wik bihain dispela gel em i senis narakain liklik. Bihain long sampela mun, olaman, gras bilong em i kamap naispela tru. Boi Jay Kay i lukim em na i amamas tru long em.

Bihain Jay Kay i tok bai mitupela i go long ples bilong papamama na gel i amamas. Narapela de tupela i kisim balus na i go long kantri Ingran long asples bilong tupela. Na tupela i wokabaut i go long haus bilong gel. Gel i noknok long dua. Tupela papamama

i harim noknok long dua na kwiktaim tru tupela i opim dua na tupela i lukim pikinini gel bilong tupela i sanap long dua i stap. "Em i mekim mi i kamap gutpela tru. Litimapim dispela man tasol." Nau tupela i amamas na litimapim dispela man na tok tenkyu long em.

Stori i bringim tingting bilong yumi i kam bek long taim bilong Ista olsem wanem King Jisas i tingim yumi na lusim laip bilong em long kisim bek yumi. Jisas i kisim ples bilong yumi. 1 Jon 1.7 i tok, *Em i klinim yumi na wasim yumi long blut bilong em yet. Em i bin tromoi blut bilong en long bel bilong yumi bilong pinisim asua bilong ol pasin nogut yumi bin mekim na bilong mekim yumi i save olsem yumi stap klin tru long ai bilong God. Na em i bin wasim bodi bilong yumi long wara i klin tru. Olsem na yumi mas rausim olgeta pasin giaman i stap long bel bilong yumi na yumi mas bilip tru long God na yumi mas i go klostu long em. Hibu 10.22*



Pikinini, yu save tingim dispela bikpela wok Jisas i mekim bilong baim bek yu? Yu tingim yet o yu lusim tingting na stap? Sapos yu harim na bihainin em gutpela. Nau em i marimari taim i stap yet long yu kam long Jisas.



Aninit i gat sampela kwesten i stap. Ol ansa i miks na stap antap long kwesten. Yu painim ol gut na raitim stret long spes bilong kwesten.

Yumi / Yes / Jay Kay / God / Jisas / Blut bilong Jisas / Wasman bilong sipsip / Jisas

1. King i laik lukim husat? _____
2. Husat i ansaim tupela kwesten bilong king? _____
3. King na wasman bilong ol sipsip i senisim klos i makim wok bilong husat? _____ na husat? _____
4. Husat i sori tru long rabis famili na i laik helpim ol? _____
5. Jay Kay i bin baim marasin na i helpim dispela kaskas gel. Bihain em i kamap orait o nogat? _____
6. Husat i bin kisim ples bilong yumi olgeta na i helpim yumi? _____
7. Wanem samting tru i save rausim sin bilong yumi? _____

Tasol sapos yumi wokabout long lait, long wankain pasin olsem em i stap long lait, orait yumi stap wanbel wantaim ol arapela manmeri bilong God. Na blut bilong Jisas, Pikinini Bilong God, em i save rausim olgeta sin bilong yumi na yumi kamap klin.

1 Jon 1.7

Gutpela Wasman Tim i laik tok tenkyu long tupela bratasusa i bin raitim stori i kam: Renate Wolf EBC Kassam, na narapela long EBC Zenag, Lae (nogat nem)



Published and printed by:
Publications Department
Evangelical Brotherhood Church (Inc.)
P.O. Box 996, Lae 411, Papua New Guinea

No 2/2018